

T5419/0160(9)

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
OCT 31 1940

慎修堂集卷之十六

河汾亢思謙子益著

誌銘

明資善大夫禮部尚書兼翰林學士贈太

子少保謚文莊南野歐陽公墓誌銘代

嘉靖壬子春 上虛禮卿位特召泰和歐陽公

于憂居仍聽終制公辭不獲冬初至 朝 詔

兼翰林學士入 內直同勳輔元寮贊密謀皆

殊典也公耆德宿望天下方喁喁期以治平自

哈佛大學漢和
圖書館珍藏印

慶遭逢亦慨然任天下之重廼甲寅三月二十三日卒于官 上震悼不能已贈太子少保謚文莊 命官護喪營域錄一弟為國子生 聖皇眷德之隆賢臣始終之遇誠曠視千古矣然天不憖遺典刑山斗所繫豈其微哉公諱德崇一字南野先生學者稱之也曾祖滌祖時勉考庸世有隱德祖考皆以公貴贈吏部左侍郎兼翰林學士母蕭氏封太淑人公初娠父母各感異夢幼神穎不羣讀書數行俱下九歲以奇童

稱邑尹延見進退如成人十三為弟子員北地李公試大奇之名動三楚二十一舉于鄉聞陽明先師講學虔臺棄所業往從再值春試皆不赴力踐精思食貧自樂有人甚不堪者癸未舉進士與同年更僕共馬講習舊聞酒食微逐不與也授知六安州至則興教化省追呼絕境外之交導原泉之利歲大饑疫捐俸倡賑設糜煮藥全活數萬人憲臣行部至過境不入曰有賢守在丁亥擢刑部員外郎會輔臣薦公文行茂

異特改翰林編修閉門誦讀不隨衆謁候預重
修會典編摩獨核郊祀議起倡者引公為
助堅不可仍疏請憲章祖制斟酌成周庶費
省民安禮意不悖壬辰擢南京國子司業日進
諸生於館下誨以心身道德之要聞風至者學
舍不能容復闢齋宇周貧病均勞逸恩義藹然
時當事者不相悅迺遷南尚寶卿三載遷太僕
少卿又改南鴻臚卿值外艱歸服既除太淑人
踰八表依依不復出暇則約予及東廓念菴諸

君子周旋青原梅陂之上相與求未發之真知
究先師之遺旨訢訢若將終身焉丙午以薦起
仍舊任丁未晉南太常卿尋召入掌國子祭
酒事遂擢禮部左侍郎寅清夙夜簡在上心
已酉改吏部兼翰學掌詹事事復命教庶吉
士于翰林公曰是國家大用需也詎文藝已
哉試課暇輒聚一堂考天人之際探理亂之原
講經綸之畧發疑蘊洋洋如也庚戌主會試
黜浮崇雅得人為多是夏太淑人卒公陳情上

請 特錫祭葬併祭侍郎公正位春會值 二
王簡婚 康妃薨逝皆禮難沿襲酌今稽古曲
盡情文 上嘉納焉宗人既衍踰僭日聞廢處
高墻供輸浸困監閣且所至橫擾公深患之會
靖江中尉某當坐公請即所在闢閑宇畧倣高
墻制居焉秦邸中尉女請封公稽 祖訓本無
封名廼疏謂親盡則恩當殺女歸則養有資請
定稱曰宗女差給婚資墻聽自便 制皆報可
公私善之又寢崇陽之封息弋陽之訟酌庶人

之糧其大如是細可畧也 初擾公即議一
大創治或請命朝鮮移責其 者公力止曰損
威招釁是可為耶嘗承 遣監 孝烈皇后喪
禮于陵所又代祀文廟者一 永明 文華代
拜宮廟祈報蓋屢屢焉 溫綸下錫至曰大宗
伯或稱秩宗而不名臥病初聞即 命中官賜
鑿問公力疾草謝泣曰 主上待臣以殊禮奚
能上報耶閱數日遂不起 聖生弘治丙辰五月
二日壽五十九耳配康氏累封淑人子男二餘

慶曆太學生紹慶舉鄉試第二女一側室蕭出
未行孫男三宗符宗翰宗發女三公天性孝愛
事父母以色養撫弟姪得親之懽兩扶柩歸哀
毀骨立太淑人合葬廬墓躬勞寢食俱廢平居
對妻子無狎容訓臧獲各治恒業居鄉創義倉
立保伍規制嚴整一方賴之與人交傾肺腑相
示不為斬絕崖岸亦不翕翕熱遇大政必與僚
屬相可否謙虛取善即見諸行法有不可矻然
不為易每恹惚填委沛然應之悉中條理羣疑

紛集片言立解聽者躍然嘗應制有敬天監
疏靈雪詩昭格賦內訓解皆寓規諷詩文諸作
停蓄深博不蹈襲前人總若干卷藏于家餘慶
等將以某年月日葬公于某山之原以銘請於
予予惟先師倡道東南一時豪傑雲集景從人
人自以為莫公若也先師語來學必曰先與崇
一論之而公自視歔然予素遲鈍定交四十年
辨論啟發寔公是資頃得同朝每慶可面相訂
正大發先師之蘊奉若以終身也而公遽至是

喪朋孤立予奚能淑哉且天之生賢不數賢矣
 而際會每艱公資稟無人躬逢 聖主方與元
 臣碩輔期翊熙明而天亟奪之其可問耶然聲
 色不大陰福蒼生者不少也公其無憾矣揮淚
 為之銘曰 聖遠言湮大道斯晦我師奮興主
 盟命代及門濟濟入室則公獨知妙契覺後包
 蒙有政大施民用和樂發為文章星虹炳若孤
 忠一德際我 聖明爰置左右眷莫與京夙夜
 在公嘉謨入告贊協臯夔周行是好有猷有為

維 國之楨無讎無黨寔世之衡篤生胡艱而
 奪則速自昔所嗟生民無祿潛膏隱澤衣被既
 多鴻名茂烈永矣不磨卹典賁終 皇恩有赫
 昭揭儒真考銘 宅

資政大夫南京吏部尚書贈太子少保謚

恭肅張公墓誌銘 代作

嘉靖壬子三月二十九日尚書西磐張公卒于
 家訃聞 天子詔贈公太子少保賜謚恭肅仍
 遣官營葬事於是公子太學生元謨等以銘請

於予且曰寔先人之遺也予昔為御史雅辱公
知起守平陽公適居制道義交三十年矣奚能
辭公諱潤字汝霖河東臨汾人幼則穎異端嚴
弱冠為弟子員文試輒首列弘治戊午舉鄉試
第一人壬戌登進士授令宜陽清修有惠政為
當時首稱正德丁卯擢刑科給事中抗言大計
侃侃不阿奉 詔覈甘肅邊儲稽察精明河外
震懼還遷禮科右吏科左戶科都給事中時盜
賊延蔓屢用大師水旱流移征調繁急公請嚴

紀律酌轉輸廣招撫時賑恤章數十上採納為
多甲戌擢順天府丞戊寅擢左僉都御史巡撫
順天至則黜貪殘拯彫弊條上邊民疾苦及便
宜十餘事悉見施行郊圻盜起 復寇邊公指
授方畧盜平 遁有白金蟒服之錫已卯以外
艱歸辛巳起撫寧夏夏弱鎮也不百里即 巢
公簡士馬振紀綱謹烽堠修築亭障聯絡聲援
境內晏然講校屯田鹽馬諸政施罷不俟日奏
正豪藩裁抑宦鎮姱嬉問遺一切絕之在鎮三

年鬚髮盡白癸未召還理院事乙酉以九載
績晉左副都御史理院五年署篆者半振揚法
紀臺中肅然每疏上皆切中時務誦者迄今不
衰丁亥以大獄譴歸田臺諫屢請錄用己亥
詔復原任遂轉兵部右侍郎又轉戶部左督太
倉公搜逋抉隱剗洗姦蠹兵民懽服明年晉工
部尚書時大工並興漏卮乾沒百出公躬勤
省閱宿弊盡祛迺酌緩急為先後上忻納之
力專功遄費省舊之半屢錫金幣褒焉辛丑

以內艱歸服除言官復請亟用會考察內僚起
公為南京吏部尚書莅任即甄別去留輿情胥
服再疏乞休皆荷溫諭不允戊申以考績赴
闕畢即過家懇求致仕時已改戶部尚書仍
督太倉矣上亮公誠乃允焉家居優游林壑
足跡不及城市然每聞朝廷一善政輒喜動
顏色見民疲役冗每悒悒不自安持守堅凝動
有恒則雖事變猝至處之裕如初使甘歸逆瑾
索賄無以應欲中危法公不為動然竟莫能害

也廷推巡撫時逆寧使人曰欲副乎欲僉乎意以賄為差也公曰惟辟作福人臣敢有擇耶寧深憾欲中傷會敗乃已 毅皇西幸寵閣請改榆河驛為行宮公力陳民貧財訕仍舊為宜 毅皇從焉正位司空權貴目工役為奇貨陽施陰奪公悉以法裁之勳戚某時主夫役請發太倉銀助工實欲私也公力爭曰此 朝家正脈軍國仰資急近利而廢遠圖豈人臣謀國忠耶事乃寢某積不能平屢以危言怵且草彈文示

公不顧也臨事精詳必求可久之計宦蹟所遺雖名人繼往率取則焉天性孝愛事親色養弗違親終並獲祭葬蓋異數也兄滋弟灑皆為納八品散官處宗族恩禮兼盡歲時祀先必謹訓諸子孫嚴而有則自奉無異寒素歷官南北行李蕭然好學問文章雖老不倦所著有奏議公移尋是錄試筆稿經畧兩鎮詩共若干卷藏于家生于成化庚寅十月十一日壽八十三祖復祥父鏞父祖皆累贈南京吏部尚書祖妣鄭繼

史妣韓皆累贈夫人配喬氏封夫人自結髮至
白首相對如賓旁無媵侍尤人所難者子男三
元哲舉人早卒次即元謨次元憲郡庠生女六
適陰玠霍文貴庠生邢汾參將李忠段袞國子
生程式孫男五知基志基承基崇基顯基女四
李如梅李友松周興東壻也一尚幼曾孫男四
繼儒繼經繼學繼科女四俱幼葬以其年某月
某日于某之原序而系以銘曰 烈烈太宰維
國之禎履方蹈古中外荐更正色危言訐謨陳

力于藩于宣功施 社稷器宏才美用罔不宜
一德自樹匪世可移屢值邪回猖狂揚簸亦既
我讎莫我能禍惟公純正惟 帝聖明保全容
受惠此蒼生 簡注方崇翩然解組嘉遁丘園
謝跡城府高風完節福履是適考終大耋孰克
與儔節惠易名 皇恩罔極勒銘 宮永示臣
則

亞中大夫南京光祿寺卿項公墓誌銘代作
公諱錫字秉仁項姓十一世祖秀從宋南渡居

嘉興入國朝公祖太保襄毅公忠以文武才
掌邦政茂烈豐功在史氏記高祖吳江丞邦曾
祖衡皆贈左都御史父經江西右叅政公幼即
穎敏讀書輒善記時學憲祝虛齋先生罷居海
上以經術間襄毅携公造其廬曰孫可教也幸
成之因委禽焉虛齋精研理奧公潛心師說靜
坐深思為文雋發奇特虛齋每喜項甥善學共
業者亦自謂不及項生也甲戌入郡庠丙子遊
太學遂舉順天鄉試癸未舉進士授令建陽建

陽閩劇邑難治公躬廉潔崇風教儉出薄入人
吏悅服臺臣交薦公可居風憲任廼擢刑部主
事益究心法律聲著西曹戊子叅政公病請告
歸侍醫藥病且瘥值回祿驚竟終躬親大事曲
盡無缺服除仍補刑部推典諸司章奏同年在
考功欲薦公自代遜謝之甲午改尚寶司丞久
次晉少卿尋晉南京鴻臚卿南臚閒局時以逆
旅視公起頽廢新堂廡時時督屬習禮容閱四
年陞南京光祿卿祿寺職涉貂璫穴姦藪蠹莫

可稽省公稍欲剪剔逸口相蟻時宰適所不悅
坐免歸公初拜命即鑒止足之戒再欲乞骸輒
以交游沮既得謝築室郊墟榜其堂曰歸來言
適願也為水丘林榭植嘉樹名花時駕輕車小
艇惟意往來風清氣和則與所過逢歡飲歌談
連日夜不厭與人恂恂抑畏無貴賤必鈞禮孤
寒之士苟有一技皆得衣食於公故人愛慕
焉八歲嫡母趙淑人卒母王淑人又卒號踊如
成人叅政公方由南臺守姑孰召公撫于田淑

人至則牽父衣言母棄去狀哀感左右弱冠歸
田淑人柩于臨江喪葬總總如禮繼母王夫人
卒公年六十矣衰麻哭泣不異少時夫人命遺
貲歸公公悉推與妹且為婚其子事諸父素謹
諸兄恭虔人倫之變含容巽順有人所不能言
者子弟有過則諷諭使改未嘗顯斥歲時宴會
必述先世積德累行事及虛齋經義以為訓虛
齋後稍不振數數周之仍置田以祀宗子元淳
有貞疾公後以孫某復撫其弱弟周防曲護不

少懈自奉素寒約生平不議人短長懷舊德而
忘嫌怨識者謂有先民長厚之風焉嘉靖癸丑
閏三月六日以痰作卒距生弘治庚戌十月二
十八日壽六十有四配祝氏封宜人子男三元
深國學生元淙舉人元沐女二一適祝世系一
幼孫男四道亨國亨時亨臣亨孫女一元深等
以是年十二月十三日葬公思賢鄉先塋之次
匍匐至都持廷尉鄭公狀請余銘余與公同舉
進士同仕兩都知公為深且鄭公言尤可信乃

銘曰 項為世族從宋南遷赫赫司馬 昭代
稱賢駿功鴻猷翼子及孫篤生先祿玉潤春溫
質直好義木訥近仁政施百里愛戴若神明刑
勅法遜謝榮途周游卿寺慎恪罔渝才未究用
責于丘園無怨無惡古道是敦惠我姻族先烈
敬承玉樹蘭英濟濟方興衣冠世美孰與為儔
刻銘貞石用贊宏休

處士王公旌表貞節孺人嚴氏合葬墓誌
銘

昔李令伯陳情抗表君子謂讀之而不涕零者其人必非孝有味哉其言之也蓋藐弱艱貞母孫相倚其愛篤其辭哀民秉天衷觸之自惡可已矣頃余讀殿中丞孝泉王公述大父處士公大母表貞孺人事狀廼潛然淚下蓋中丞公週歲失恃鞠于太孺人以迄于成其哀慕之篤未始異云處士諱寅明仲字河東之蒲州人諱長一太一者曾祖祖也父健母葛氏公明爽有心計多膂力長業化居南歷江淮西踰秦隴勤勤

無少怠貲用遂饒居常酬應謙恭和巽不異士人然見人不善必面斥無所諱同儕有隱已旅貲者薄之終身不與語兄厚不事家人生業弟政為諸生公敬愛周備始終無間言兄費日侈父以市肆一區託券於友某欲以警之也某遂誣為已有公竟如其所誣直俾以復之與兄弟共馬嘗持十餘金適市值追逋困迫者悉舉以貸不問其姓名旅行遇盜同事悉竄伏公瞋目大呼直前格鬪羣盜駭逸去其慷慨直前類如

此廼成化甲午五月初一日自關中病歸抵家
卒距生正統丙寅五月十三日年二十九耳孺
人嚴氏者州人伯霄女時少公五歲日夜號泣
絕而復蘇廼屏簪珥謝膏鉛惡衣蔬食終日不
出閨闔閱五月遺腹子珪生即中丞公父贈兵
部郎中公也頃之父母憐孺人少陰遣所親以
改志諷孺人艱然曰夫有兒兒成則夫死不死
可以不負王氏矣吾忍為此不正之行而使子
女無依哉今日有死而已斯言母再吾聞也遂

絕姻鄙竟不歸寧舅氏春秋高性且嚴急孺人
志承色養竟得其懽事姑頃刻不違側姑日熙
熙若其子之存也晚喪明扶掖便溺污穢無所
避姑病亟呼孺人曰吾何以報汝何忍舍汝耶
密授以耀首遺資踰數十金誠母令諸婦知姑
卒竟出與妯娌均焉初處士沒家事漸落叔伯
復侵匿贈君稍長屢欲有所質輒止之曰汝幸
已成立他何足計耶贈君授室張宜人日示以
婦訓撫視之若所生張宜人舉中丞公甫踰歲

而卒孺人躬為鞠育食飲醫藥劬勞備至六歲
遣入鄉塾擇里童之謹厚者托與偕行迨幼學
雞鳴即呼之起令誦讀達明日毋怠荒自畫也
嘉靖戊子中丞公得舉歸拜于庭孺人泫然曰
汝識汝母面乎中丞公悲不自勝孺人曰汝父
不識汝祖面汝不能記汝母面父子孤寒不謂
有今日矣將何以慰先人於地下耶又曰吾苦
節五十年藉天之靈汝幸有成立自此寄膺民
社尚存良心以奉天道耶中丞公歷官介慎孺

人之訓有力焉巡按侍御穆公廉孺人行實乃
疏于朝若曰嚴氏女德婦儀修全卓越保孤
再世始終一心允宜寵綏以厲閨壺制曰可
於是所司躬禮于家樹表于門孺人顧感然曰
是豈吾心哉嘉靖壬辰二月二十四日卒生以
景泰庚午二月初五日得年八十三云子一即
贈公配張氏繼祁氏李氏高氏女二適李銘闈
仁孫男三長輪即中丞公娶何氏張出軫娶洪
氏祁出軻早卒女二適景鎬楊紳曾孫男七閣

早卒閩聘楊氏總督尚書南澗公女闈聘保安
州學正杜公女女四一適景賓生員蔓子一適
楊俊民兵部尚書虞坡公子一適黎從政署都
指揮僉事黎公應襲舍人一幼俱輪出門聘郎
中李公女闈聘知州雷公女問早卒閩尚幼女
四一字封君張公子四象未成禮而卒一字國
子生紫鳳池子紫嘉霖二幼俱軫出孺人沒中
丞公方為舉子時所司促停柩例嚴乃癸巳十
二月葬于新塋越二十八年辛酉中丞公解重

薊門頤真洛社卜茲吉壤消十二月六日合葬
處士孺人于保全萬國麓之原乃走使入關徵
銘于公時公方持計上都亭然締交中丞公二
紀餘矣義不得以脂車辭竊念處士抱倜儻之
懿而報嗇于身孺人抗艱危之貞而綿于後
乃今發祥集慶中丞公經綸石畫為世通儒安
攘戢寧為邦鎖鑰樞衡大業天下方喁喁望之
恩綸馳典所以發德之幽光者未已也乃銘
曰維王之先以爵為氏逮公嗣興爰隱于市

孝弟質直內含章美若構若堂方植而圯變彼者媯栢舟自矢遺腹朶朶訓誨勤止撫育元孫以燕翼子文武憲邦厥宗振起爾公爾侯自今伊始振振繩繩式介繁祉保泉之宮透邈峻峙噫嘻世風于焉是軌

壽官待贈靜菴張公墓誌銘

邯鄲有篤行君子曰靜菴張公以嘉靖丙寅十一月十三日卒季子給諫君卜茲丁卯十一月初九日葬于城西南祖塋預期絨所述狀屬其

門人趙生鰲賈生河走書河汾告公曰吾先世類有隱德及人而無興者至先君不有於其躬而以貽後昆小子不佞遂得徵入瑣垣方期沐

寵靈以顯榮吾親迺今未逮也痛何如耶葬

有日子為我銘諸宮按狀公諱繡字大錦曾

祖義祖鸞邑廩生博學強計有雋聲未第蚤卒父滕母趙氏生子二公其長也垂髫時喪父始解事即奮然曰先人門戶詎可以吾孤童隳耶乃折節治生備履艱險既而田廬市宅駸駸豐

裕矣布衣蔬食不少逐紛華每雞鳴起盥漱冠裳汛掃庭宇里門初闢即率僮僕入田所力作不少休自結髮至皓首未始一日晏起科頭也弟繪幼多病艱於言就醫東明觀因依以居公繫念不置病小愈即迎歸築室樹圃日以娛之然疾竟不起公哀痛幾不能勝初公祖之歿也祖母楊氏二十有六公父之歿母趙氏二十有八姑婦零丁相依為命日勤績紡競抗嫠節撫遺孤底成立人稱之無間言公稍長共奉二母

視顏色怡志意俛焉孜孜靡所不盡恒得二母懽母性尤嚴潔稍不當心即不言不食公引咎長跪百計求悅解顏乃安母寢疾時八十餘矣艱於起處公偕配鄭孺人躬侍醫藥晝夜不解帶親調旨甘進湯沐假寐伺動止踰年所問長鄉大夫至於邑令察公及二母三世節孝過人也移檄嘉勞勒姓氏旌善亭中頃給諫疏聞于朝恩褒行錫矣公賦性淳篤樂易光明生平未嘗有一誕詞與一物忤暇則歛膝危坐惡

聞喧阗因號靜菴云族指甚繁其孤貧老病及婚喪不舉者隨疎戚各有所資甚至獨任其事無少吝隣有橫罹不測者夜求援於公輒傾囊周之又明年隣窘甚乃持田券請曰公惠我厚矣度終無能償請以是報公固辭不可止乃倍以直酬里有大俠播惡邑中亦數侵侮公會邑令銜之投牒發其隱者數百人或邀公與同公曰擠人于方危吾不忍也顧慰藉訊候無怠心盜竊公資數十緡邏人獲之聞于邑邑以歸公

愧謝曰非吾有也反曲為求免焉田宅基畔隣屢見侵一切不與較或以懦為譏乃曰滄海桑田幾變更矣詎能久據耶往士之薦于鄉者有司沿舊額以百金相贈辭曰作興給諫君之領鄉薦也公年七十有五矣獨毅然云取諸彼以與此如女心何卒教之勿受士欣欣慕焉至今為例晚歲與里中耆舊結會為懽從容宴聚若香山洛社然者邑大夫以公年及榮公為壽官預鄉宴輒退讓不欲居雖少孤失學而識趣超

卓有經生宿儒所不能及者訓諸子日以忠孝勤儉退讓守拙為規見人有以智術自炫者即曰拙藏巧巧藏拙玉籠金索寧繫老鴉乎吾不願汝曹為也諸子率循訓誨取則聖賢勵志心身之學方繩繩然繼也給諫君舉壬戌進士筮今襄陵迎父母就養官舍備極承懽時時即舍中池亭奉觴為壽再歲池中輒產嘉蓮人以為孝祥給諫莅襄二年餘廉潔敏惠聲績冠一時先皇擢為兵科給事中復迎養京邸公素強

健寡疾病居無何忽心動欲亟歸給諫君乃以情白于上得扶持抵舊廬優游豫悅者閱數月而公終蓋若神啟而相之焉距生成化甲辰十一月三十日得壽八十三先配李氏彥誠女無出繼即鄭孺人端女生子四國巖娶李氏瑋女國臣娶劉氏浩女國士娶曹氏教諭璜女季即給諫君國彥娶蔚氏奉女臣儒士少巖九品散官士邑庠生俱先公卒女二長適周國政次適邑廩生宋希文孫男六我承邑諸生娶謝

選女國士出我繼娶王主簿嘉相女我繩聘李
按察堯德女我紹幼繼繩皆邑弟子員俱給諫
出我述娶栗茂女我達聘庠生閔鶴女俱國巖
出女七一適李廷茂二許王進第余師湯一尚
幼亦巖出一許李孔問廩生志尹子一許聶敬
修太學生尚勤子一亦幼俱給諫出曾孫男五
汾涯洗心我承出玉堂金堂我繼出落成我述
出聘庠生朱綸女曾孫女一未有行亦承出惟
公康寧偕老遐筭令終子女孫曾多賢王立人

間福美備矣而給諫君古心直道望繫寰中方
為時所需其所以褒異顯揚乎公者日新而未
已也是不足以章為善之效耶銘曰 力田孝
友漢用興賢維公敦行順德允全奮庸宣力若
彼古前並驅萬石詎知後先道未小試澤已被
鄉身未受命子也賓王為邦司直如珪如璋有
膺孫子顥顥叩叩聿求世德寔大公門作善必
報若本若源積深植固流遠枝繁綿引弗替永
賁高原

月巖徐公墓誌銘

公諱息字敏誠徐姓月巖別號也曾大父昇大父英父雄皆隱德不仕母楊氏公幼溫醇沉默長則倜儻有心計時公父同兄弟五人操奇贏踰秦隴往來吳越逐鹽筴之利公服勞承志推移俯仰獲息輒倍徙不數年積貲鉅萬乃為高堂曲館諸父昆弟晨夕周旋洋洋怡怡如也子姓數十人亦無間言者閭鄙難之公豪爽自持臨財不苟市利所入悉與衆同尺帛一錢不入

私室嘗行貨于蘇價溢數百金或諷之曰是不可為妻孥地耶公大笑曰貪昧齷齪豈丈夫事哉卒一無所私中歲即次毘陵郡多名流達士慕公行誼咸折行與交被服儒素不事富人侈靡之習子節甫有知即延訪名師資遣就學夜則令執經讀而聽之率宵分乃休晚好觀史暇則退居一室手卷吟哦欣然若有得者雖值橫侵貸負亦恬不為介每指節曰吾家世以善聞而未有顯者天道可謔其將在若耶歲戊申遣

節歸臨汾己酉節舉于鄉庚戌自南省渡江則請公還舊居公輒曰胡汲汲為是哉吾居常也久土風心樂焉埃爾第歸寧晚耶仍督課節如少時癸丑節舉進士公已屬疾捷書至大喜起坐曰子能如是吾目可瞑矣廼書屬節云子遭逢明聖厠迹大科尚努力委躬克有樹立吾雖不沾祿養將含笑九京也節試政天曹得書大惶惑不自安方圖歸侍而公不起矣嘉靖癸丑四月二十日也將屬續召季子簡勉以淬志

力學毋忝爾兄戒家人勿事祈禱處分家事井井然適也距生弘治癸丑八月二十八日得年六十一公天性孝愛蚤事諸父咸得其懽心弟懃之歿哀慟特甚從兄懋卒嗣復天業殖漸落以次子後之仍經紀其家周賙貧乏恒如不及故卒也遠近咸惜焉配安氏早卒生女一適陽曲鎮國將軍某繼周氏生子男三長即節妻予仲兄子次策則為兄後者次即簡女一張三才壻也進士既聞計悲號困頓持狀過予曰節

受先君罔極之恩每期自奮勵以酬萬一也今甫成一第而先君不待矣先君寔知外舅忍靳一言以為慰耶予自早歲則聞公名締姻十五年每以未一識面為歎而今已矣然熟見進士之修文砥行則得公者豈淺哉葬以某年某月某日銘曰承家服賈卓行若儒義方訓誨夙志迺符玉立長身抗言正色敦睦友于之老不忒作善未食爾後孔昌匪惟文藝允珪允璋懋績奮庸以顯厥世維千萬年永永勿替

邑庠生北麓翟公墓誌銘

往歲藩叅西石王公行部河東既試聞喜諸生歸為予言有翟生者負雋才奇氣少頃必顯名宇內予心私識之未幾翟君以內艱不入鄉闈既服闋則預侍御容堂吳公試仍亟稱翟君遂錄置河東書院躬指授之時予弟思禮子孟禎並被吳公所鑒拔獲同翟君游歸輒誦翟君賢甚悉歲辛酉舉三晉禮經第二人所司錄其文以式明年遂舉進士授令雄縣未數月循良聲

稱洋溢河朔予心愈嚮往之癸亥冬予入蜀過
聞喜廼翟君以父北麓公憂制歸即往吊焉則
見翟君墨面戚容哀動左右言不能成聲身不
能勝服予益愛重焉比予自蜀歸翟君縑經造
予手廷評戒菴李公所為狀徵予銘按狀廼知
翟君之賢北麓公成之也公諱華字向實世為
聞喜人北麓先生則學士稱之云曾大父從義
大父巖父翀母孟氏生子四長曰憲次曰章次
即北麓公季曰武世以行誼聞率隱於農畝公

資材警敏幼而向學雅負大志稍長則從內兄
安定學博孟先生端受毛氏詩尋補邑弟子員
邑侯無錫蔣公奇公文延之同其子講習然試
于有司輒不利既而兄弟各分異父母復春秋
高公廼慨然曰親老而甘旨不能充徒窮年俯
首事筆札可謂本末舛矣乃以情白學憲文岡
陳公乞習農事以為養同舍生共留止公謂稍
須之青紫可必得公不謂然躬耒耜勤耕穫歲
時伏臘則稱觴為父母壽父母愉愉如也暇即

博極羣書務求得其旨趣春秋釋奠必齊沐趨拜學宮與人居醇雅可親然天性剛方臨是非直言無所假人有與之謀者必竭底裏相往復故邑之人士無少長率愛慕公非徒以年也初公口授翟君以毛詩既精熟及宅憂公舉戴禮一編授之曰茲非若今日之所當誦耶然吾邑專是經者寡予心實病之子即執是以成名可也翟君奉公言探討研窮至廢寢食不再年遂舉高第連捷南宮今黌序譽髦愈駸駸為奮焉

進士君既莅雄迎公就養宦邸公杜門靜處不妄面一人每謂進士君曰吾生平最苦文業而志竟莫伸今有汝矣豈必在我躬耶然履正奉公體民潔已吾之願也汝其母子忘哉進士君以臺檄從事邊關忽思公而心悸請給歸省覲不數日公疾作遂不起嘉靖癸亥八月十二日也距生弘治辛亥二月二十三日得壽七十有三配馬氏同邑耆民其女貞靜淳一夙稟自天孝敬柔嘉有聲婦順生以弘治庚申十一月二

十一日卒以嘉靖丙辰六月二十九日得年五十有七子男一繡裳即進士君娶李氏女二適王平王思孝孫男一曰承祀孫女一俱幼進士君卜公卒之次年十二月十六日葬于姚村之原遷孺人攢合焉惟公為養輟業而親志以懽庭訓義方而子名以立今進士君溫文端恪若良玉精金方為世重寶公于彝倫俯仰誠可謂無遺憾矣為銘曰 古人一卷三公不易千載寥寥興懷簡策謁謁翟公為時矩矱息志名場

躬耕農陌甘旨孔嘉親心豫懌獨抱遺經窮探遐索有子敬承偉然俊宅射策 楓宸 皇恩有赫試令郊圻剗煩治劇敷政優游循良比迹遡厥由然趨庭教澤惟公克孝親闈啞啞惟公克慈子聲籍籍質彼古人曷殊寸尺壽考令名猗與並獲昭示萬年勒茲 石

勅封太孺人王母梁氏墓誌銘

太孺人梁氏者襄陵人前新城司訓今封文林郎豫齋王公用中之配監察御史王君應吉之

母父曰三山先生鉅經術精奧以貢入太學未
仕卒母張氏太孺人其季女也生有異質少則
服習內訓端貞婉惠尤精女紅梁先生絕奇之
曰此女非特能貴其夫殆又能貴其子乎邑里
聞其賢競通媒妁梁先生皆麾去弗許是時豫
齋公未冠而雋爽特異方治三禮有令名梁先
生識而心儀焉及媒氏至亟允曰是佳壻也太
孺人既歸豫齋公事舅姑饗膳必精紉刺必慎
志承色養成當其心待如姊諧而以義處內外

姻族和而有恩下逮梁梁醞醞瑣細之屬悉有
條而不紊閨壺之內秩秩如也豫齋公抗志六
籍藝業造深每學使試諸生輒褻然首冠嘉靖
中么同公秋試會城時全晉才蘊卓然之士無
慮數百人皆推遜公弗敢先以為高第若持券
取也乃八試竟不第公嘆念弗能夷太孺人曰
龍潛豹霧修以俟時田見文成非力可強君豈
修之未至母亦俟之已耶侍御君幼即岐嶷穎
悟大孺人曰兒當夙教而養無若溺愛者後時

之悔也甫成童即俾受庭訓督課勤嚴道以義節以禮時其興居慎其資友侍御君志趣卓越砥行修詞弱冠即舉于鄉豫齋公愈益發憤誦習不少輟孺人懼其鬱困久弗堪也從容語公曰失得相感其機同父子相成其理一兒之業非君之授乎君失舉而兒得之謂與君得異耶豫齋公笑曰有是哉乃就貢與計偕廷授新城司訓乙丑春侍御舉進士公謂孺人曰吾將歸休若何孺人曰仕以行志非干祿也君淑士

以身志既行矣且子克樹立是將大發君志於不窮者歸維其時哉遂上書乞身會遷博野教諭亦不赴時論以為高乃孺人寔相之也侍御試南宮孺人夢侍御升於新城校門之上而不下既寤謂公曰此善祥也行有徵矣未數日捷書至邑令幟錦題名樹表適張所夢處焉其明慧燭理類若此侍御授尹安丘安丘東藩疲邑俗剛果難理豪猾占膏腴地潛移其賦於貧弱貧弱坐是困而流離逋賦積數十年莫可稽前

令率緣不治罷去侍御以為虞孺人曰是奚足哉毋黷貨毋肆威躬儉約而施惠和人無不化者矧齊魯邦耶且賦可移田不可匿覈田以稽賦毋憚夫身先且勞也侍御至則厲廉潔之操秉羔羊之節悉心化導不事威刑民以大和乃躬履土田糾正欺隱百年宿蠹頓爾廓清邑人忻忻謂得賢侯暮焉于時聲稱籍甚迺孺人寔啟之也部使者疏揚異政後先十餘上三載績奏 詔封豫齋公如其官太孺人得今號云已

已冬晉禮部主客司主事乃迎父母就養宦邸庚午夏改陝西道監察御史明年銜 命出按江北便道奉二親歸于襄聚樂庭闈依依不忍發孺人曰 國家命代狩之臣固冀以昭宣紀度澄清萬方也汝不欲遠父母獨不畏簡書耶侍御不獲已乃攬轡登車既行部正已率下風裁震一時孺人聞之融融樂曰兒不負是官矣越明年感痰嗽初不以為苦也居無何竟弗起隆慶壬申五月二十四日距生正德庚午九月

七日得年六十有三子一即侍御君娶盧氏先
卒贈孺人繼楊氏封孺人孫女一盧出許鴻臚
署丞喬君淮子可聘侍御照訃號慟西奔哀毀
幾不自存既乃請於豫齋公卜是歲十月十七
日葬太孺人於鄧村之原先期屬貳令劉君偉
計部高君溱以鄉進士黃石景澤狀徵銘於予
予交待御君父子間也久百知太孺人賢是宜
銘銘曰 於惟孺人令儀令德作配君子柔惠
維則外襲溫恭內含朗識琴瑟靜嘉女士是式
王公倦遊衡門勇即計決贊成孺人有力篤生
詰嗣邦之司直熙載奮庸爰補衮職丕振風猷
正是四國諤諤匪躬義方有得偕老榮封而康
而色壽熾允臧秉心翼翼婦順母儀兼舉罔忒
嘉譽休光洋溢充塞有莪 堂汾水在側懿教
用章垂示千億

誥封淑人高母袁氏墓誌銘

淑人姓袁氏故湖廣按察使蘇門高先生配也
父諱寶以子陝西按察僉事永爵貴贈池州府

慎修堂集 卷之六 三
同知母楊氏贈宜人初先生父大中公尹東光
有孚惠夙善袁公高與袁皆祥符鼎族弘治辛
酉七月七日淑人生庚與先生同先生幼穎敏
卓絕淑人以明慧稱乃締婚云于歸之明年為
正德己卯先生舉于鄉又四年嘉靖癸未先生
第進士授營繕主事未幾改考功迎太淑人就
養京邸淑人總持內政躬調滌澆賓祀之奉下
至米鹽瑣細周有漏遺每雞鳴即興夜分乃寢
以為恒會 天子尊親禮成推恩父母如子官

淑人初封安人焉戊子先生進司封郎中時宰
新貴權張甚先生不悅為之屬適議外戚伯封
堅持不署草欲以官爭之淑人曰直而不挺曲
而不詘君子所以全身也君夕惕揆事砥節首
公廼用不訾之軀觸莫測之釁孰若守志卧疾
歸奉二人之為安耶先生遂謝病歸草舍數楹
僅庇風雨薄田數十畝僅供饘粥淑人食淡攻
苦以佐中饋若將終身然時弟僉憲公甫就學
因命從先生授經卒成今名越三載先生病滿

期有司敦勸行起補稽勳郎中明年以白友人
誣復忤時宰遂出叅山西政淑人皆從之官先
生行部冀南會撫臣入浮言喜興革民寔苦煩
苛羣白於先生故緩其議撫臣怒錄治諸掾史
先生不為動遂三疏乞休為養皆不報時先生
仲兄太守公方為南京儀制郎乃遣淑人旋大
梁養舅姑舅姑安之若忘二子之去膝下也丙
申先生在晉滿三載以績奏 天子嘉之再封
東光公大中大夫山西左叅政母 氏太淑人

淑人進今封焉明年先生莅湖南僅三月感寒
疾不起淑人哀痛悲號絕而復蘇者數四時長
子年甫十一次僅八齡每泣謂之曰吾豈不能
自引決以從汝父耶顧舅姑垂白汝孤幼無依
耳言已輒大慟既乃挈携二孤遠道迓葬遂扃
鑰珠翟屏斥鉛華姻鄙禮筵一切謝絕雖至親
罕見也初先生篤嗜立索悉力購求傾囊無所
恡卒之日俸餘不滿三十金而遺書充棟淑人
日取以課二子曰汝父學為儒宗仕稱廉吏所

遺汝者惟此耳汝可不研精諷誦甘同庸衆耶
在楚時值察察母為壽左右曰聞諸夫人服飾
鮮華夫人獨無意乎淑人曰吾僚長配期以儉
朴先之若言胡為哉及至會淑人自命服外褻
衣練裳若不知珍綺之為華者雖先生清節刑
家亦淑人儉素有相也先生之喪淑人哭踊不
自知遂感氣結疾每作輒危竟以不起隆慶壬
申九月二十八日也享年七十有二身長子不
危詞翰古雅克世家傳每秋試主司以不能錄

置門下自疑而不危未嘗以自沮也今尚列廩
生娶胡氏次子不愚亦邑生早卒娶郭氏女二
一適王中立亦卒一適趙尚仁孫男五一麟配
李氏一鳳配王氏一卿配谷氏一鵬配 氏一
儁配王氏孫女六一適秦周德一適李鯁一字
李孺童餘尚幼二壻諸孫及周德皆郡邑弟子
員曾孫男二承文承憲俱幼淑人歿之三月不
危走千餘里手所敘狀徵銘於公公自蚤歲受
罔極之知於先生每執經門下庭宇寂靜僮稚

無敢譁心固儀內位之正也視學入梁則聞淑人嘉美聲稱曜于邑里登拜闕外則見詞旨無浮步履中度穆穆若有遠思焉竊嘆曰卓哉賢母誠德合先生矣是宜銘銘曰維高先生雅潔特立志陵青雲榮祿寧入寔有淑人隱約夙習共貫丘樊桑蠶勤執倏蹈未亡矢心貞一昭儉躬勞式穀罔逸振振孫子嗚嗚終吉經學綿延遺安廉直婦德母儀隆家維則世典光垂過者是式

太學生五谿雷公墓誌銘

嘉靖癸丑余校藝南宮得一卷然有輝甚奇之拆號則建安雷金科公憲也比來謁朗然玉映退然若愚與之論古今治理遐邇名物靡不淹究志騰踔謂古聖賢可立企余滋奇焉聞叩其所自則曰是惟家大人五谿先生之教也不肖何能爾公憲賜進士未十日先生訃聞即號慟南奔匍匐過余以銘請余既雅重先生公憲又在門何能辭先生諱璠字國徵雷姓其先

蜀郡人裔出唐忠臣萬春唐季諱鸞者避亂居
建之璜谿遂家焉鸞之孫友敬封豫章郡公
友直大中大夫子孫蕃衍遂為望族先生曾大
父濬大父仕蔡父文照世有隱德先生秀爽敏
惠遜志積學痛父及嫡母王氏皆早卒奉母劉
氏甚謹弱冠選為弟子員遂遊太學謁選銓曹
以母老歸養依依不忍違竟不仕每朔望晨興
必焚香祝天願母壽考如是者三十餘年訓迪
諸子延禮名師督責化導恩義無至暇則究心

岐黃諸書直探奧旨尤精脉訣病者趨之隨藥
而愈生平好施予宗族姻鄰有貧不能婚死不
能葬者必捐貲為之助豫章大中公祠堂二歲
久且敝先生率眾新之仍修祀典俾無墜夙負
奇氣不為媿阿雖居田里見民間利病憤然若
迫於身郡山產巨木販者輒乘漲縱筏順流而
南突廬舍傾橋梁民甚苦之擅鐵冶之利者供
役多逋逃為里中梗歲歉則遏糴自私先生皆
白于官為厲禁民以不病孝愛純篤義問敷布

雖兒童走卒亦欣欣敬慕正德丁丑盜剽鄉邑
獨識草先生門相戒不忍犯鄰人聞而效之獲
免者數十家嘉靖丙申鄉人不戒比屋延燒先
生居巋然獨存嗚呼先生終身韋素而高風義
烈足以回天變化強暴彰明若此使食君之祿
立人之朝則其所以感格而昭宣者又不可想
見耶壬子冬劉孺人年八十有三以疾卒先生
方臥病感慕哀號踰月亦卒癸丑正月一日也
距生弘治戊申十一月七日壽六十有六配童

氏生子三金聲金章金科繼吳氏生子四金和
金相金麟金貞側室子一金昆聲章和昆皆庠
生童出女二適庠生魏應鵬李薰孫男七女四
曾孫男一葬以甲寅十二月十六日于里中龍
山之原銘曰 睢陽大節維雷之先閩南避地
爰自鸞遷蟬聯奕葉世德是營先生早奮履素
含貞孝不違養哀慕終身義方有覺八士若荀
才未時用克施于鄉德未食報族則日昌化暴
滅火古哲所難勒銘昭美永以不刊

慎修堂集 卷之七
父貴有隱德不仕大父雄判邳州以子貴封監
察御史父鸞舉成化甲辰進士自御史遷山東
按察司僉事風紀獨持為時倚重迄今祠于鄉
母李氏封孺人公資稟超異少承庭訓即篤志
厲行綜考羣經文采蔚然弘治甲子舉于鄉屢
困春官而志不衰嘉靖壬辰始就選長垣令時
太宰王恭襄素知公故特強之仕也既莅任則
與諸父老約曰某不類不能繼先烈揚休光謁
選而來非某志也其或黷貨以徇淫刑以逞所

不先烈是承者有如此日廼刺勵廉節敦崇儉
約絕靡麗之好出入戴星凡可以為民利者莫
不悉心為之所不期月而政成民大悅諸上官
有事畿內若清牘稽倉檢災覆獄類承委公即
事事當致官意無不下禮幣勞獎者既四年擢
知鄧州垣民思之為立碑記德在鄧州適
皇上下狩龍飛駕出屬邑公平道路理橋梁飾
行宮潔庖漏上供軍衛下至帷幕器皿靡不恪
豫事集而民不擾時旁郡多獲罪或解印綬去

而公出其素定之方從容指授故獨無事庚子擢宗人府經歷纂修玉牒公與焉日給大官飲饌時論榮之既三載考績進封公父為奉政大夫母宜人甲辰春出守臨洮臨洮邊郡也民雜頗稱梗公勵躬率下戢暴禁奸張教興文民安俗化甫數月以年老乞歸家居五年不冠帶不出戶庭非禮宴不入官府官府事子弟輩或論及輒斥責之配楊氏贈宜人先公卒四十六年繼李氏封宜人先公卒六年再繼趙氏

子男一即子秀楊出女三適丁某一尚幼俱側室張出孫男二惟真一幼公生以成化丙申三月初四日葬以壬子八月初十日于古義郭先塋之次余自幼聞公名乙未識公于京邸即荷公知公歸自洮予往候之公欣欣然曰吾今乃得歸也予舉進士公走書賀予甚懽予以公優游順適期頤可卜孰意公遽至是哉且公抱遠器有大能惜筮仕稍暮而當道者復泥資途材不究用惜夫乃為之銘曰粵稽馬氏夙著河

東有赫柱史克世惟公理煩應變畀材寔豐三
知歷試並奏膚功長才未究名實亦隆既昌嗣
續壽考復崇嘉樂方始奄即
宮刊銘幽石昭
示罔窮

奉議大夫河南開封府同知靜齋張公墓

誌銘

靜齋張公謝開封而歸也年甫及耆精神悅澤
迺與里中諸耆德選勝結社日熙熙然遊歲辛
亥予以史職使江藩歸里中公偕諸耆過予晤

言移晷衣冠古雅言議雍和疑睢陽洛社未往
云越五年予視學入梁再過家諸耆彫謝者半
公巋然獨存既與公仲子締姻好迺時時侍公
談每及經世大務率胸中有成計惜未盡見諸
行耳別甫踰年公子馳書以訃聞蓋嘉靖丁巳
五月十四日也且函狀屬銘諄諄然曰寔維先
人遺語子毋辭焉公諱懷邦字潤國號靜齋世
為臨汾人高祖禮元季隱姑山天朝平定徙
郡北郭以人才徵不就生子儀為邑學生子儀

生迪以貢仕單縣簿是為曾祖祖也考守忠任
宋莊丞妣喬氏成化庚子三月二十一日生公
公生之夕喬孺人夢紫衣人以朱丹一粒令吞
焉幼疑重不嬉戲英敏過人隨宦宋莊獨負笈
之慶陽從崆峒李先生學歸為弟子員每試輒
高等名動一時正德庚午舉省試乃上春官屢
不合嘉靖癸未就選天長令邑畿輔地雜戎伍
獷甚號難理公清嚴平直政畫一無二視戎衛
莫敢譁鹽徒入疆躬率民兵捕之號令明肅衆

爭先用命生擒二十餘人迄公遷不敢犯甲申
歲饑籌畫調贖民獲以寧又明年秋成蝗集民
嗷嗷然計無出公竭誠露禱引咎自責是夜四
野如聞咤逐聲厥明蝗盡去禾損者僅十二三
督鹺使者廉其賢數以掣鹽屬往掣者多啗重
利公皦然不污而商亦不怨三載奏績以臺臣
屢薦 誥贈宋莊公文林郎母喬為孺人又三
載以臺諫徵會忤當道意授遼東太僕丞邑人
悲號不忍舍留履以寄思之遼 詔修築諸塞

垣亭障公躬任其勞甫三月工成賜白金綵幣辛卯以制歸服除補任甘肅會大入調兵日棘饋餉不繼撫臣以為憂公請隨商所有從宜給兵優其直時大便之又理分巡督儲事事罔不立濟臺臣各薦公可大用丙申晉同守開封理戎務開封郡劇政繁公時時攝郡或理河防兵糧諸廳率優裕如暇時已亥春上狩承天道境上憲臣檄公往治鄭州公構行幄豫供需口授心惟至忘寢食下逮百官六軍之次

舍餼廩率不匱不遺又再監理文闡綜畫嚴密士心悅服辛丑入修覲典遂致政歸廼開園沼以陶情創館塾以訓子視一切紛華榮進若相忘然社友既零杜門謝客凝神密室習導養之術顏童齒固予意公壽未涯也詎意止是哉平生莊靜寡言笑喜愠不色見與人交無城府稱人善若已有聞人過絕口不言得壽七十八云配蕭氏封孺人處士洪女事公五十年攻苦茹淡相公名成未嘗有反目態既被封日御荆

慎修堂集 卷之六
布如未貴時母儀婦道內外稱之以戊申十一月八日卒距生成化辛丑十月二十四日年六十八子二崑崙皆國學生崑娶亢氏繼高氏崙娶安氏繼陳氏高氏女四適李光濟賈陞李光淳俱太學生一適劉世相孫男一汝廉亢出配劉繼馬女三一適輔國中尉新全高出皆崑子一適生員馬邦教安出一許予子孟禎陳出皆崙子曾孫男一炳然儀賓外孫子女二十餘人皆公所目見者往蕭孺人卒擇地葬于郡東周

庄之原二國學以戊午六月八日奉公合葬焉公天性儉素終身無妾媵蕭孺人既歿乃娶馮氏奉巾櫛馮鄉貢士春女也後公一月卒生于弘治癸丑正月二十日今得祔葬云為之銘曰淵然者度粹然者德位莫副之為我心惻澤遍中原功垂塞北亦究厥施維民之則解組丘樊其儀不忒式是國人邦有明德身其康寧子孫抑抑偕老齊眉 官同即綿綿德馨峩峩封域昭示萬年堅珉爰勒

文林郎山東魚臺縣知縣西藍王公暨配

旌表貞節孔宜人墓誌銘

公諱相字君佐晉之洪洞人曾大父某大父某父俊壽官母宋氏公生而資稟超特稍長精研丘索綜貫百家言為文雋發有奇氣遊邑庠督學四明楊公東郡教公校公文皆冠多士弘治乙卯分巡嘉定伍公大奇之曰吾夜夢巨棟騰空覺而紀以詩有不凡才之句應在子耶是秋舉詩亞魁所司錄其文以式嗣是執經問難者

恒數十人邑人若許侍御喬戶曹郭涉縣皆朝夕授之業者門人師尊之稱曰西藍先生云然數奇六試春官無所遇正德辛未壽官公老促之仕廼就選時石淙楊公為太宰太宰故視學三晉雅知公簡授魚臺令公單車之任甫及境即捕大俠朱某寘諸法民心懽服時流賊方去邑城郭廨舍悉遭焚破公闢瓦礫創官府明政令舉廢墜謁孔廟則進諸生與之講經史甫數日即條教肅然勞瘁既極復念壽官公迎養莫

遂忽疽發于背卒時八月初一日距生成化已
丑八月某日年四十三耳視事未十日邑人哀
悼之迄今猶知有公也配張氏陳氏俱先卒繼
宜人邑人完女也性端懿貞靜不苟言笑精女
紅及笄歸魚臺公相敬如賓聞魚臺公訃年甫
二十四號慟殆絕時二子在襁褓家徒壁立迺
躬井曰勤織紡以奉舅姑孤燈敝帷矢死銜恤
以拊遺孤稍解事即擇師俾就學課督嚴肅困
苦勞瘁人間之不堪也嘉靖甲午子三接果舉

省魁歸宜人泣謂曰汝父以困于甲科齎志淪
沒吾恨迄今未已也汝幸舉矣尚力勉之歲丙
午宜人年六十郡邑臺臣各表其事上嘉之敕
所司樹表旌門仍復丁夫以養 命下為丁未
春迺子適舉進士綸章宮錦母子同榮華扁金
書焜耀里閭宜人獨愀然曰從一而終妻道也
仰千寵靈豈吾志哉戊申王子授尹博興遂奉
之官則訓之曰守官箴重民命節浮費政之先
也弗克由非吾志矣王子奉惟謹期年政洽化

行憲臣交薦有清慎自持孝廉並著之語辛亥
秋王子以臺諫徵宜人復歸洪洞甫閱月而疾
作竟不起夫抗嫠節歷艱屯餘四十年祿養方
殷而遽至是悲夫悲夫生以成化丁未十一月
二十四日卒則壬子正月二十四日壽僅六十
六子男二三德娶許繼燕次即王子娶李封文
林郎九卿女也女二適許綬張出適石思忠宜
人出孫男幾某某女幾適某某王子之京為飛
語中傷出補寧國府同知陞除之晨即宜人沒

日也飛行而訃至擗踊悲痛幾不能生既廼號
泣西奔將以其月某日合魚臺公葬于某山之
原以同年阪泉孫給舍狀徵銘於余余之舉于
鄉也與王子聯名又同舉進士相得甚驩魚臺
公之屬志修文宜入之堅貞苦操王子之克承
母訓以成父志皆知之深者王子今仕雖稍淹
然知者固多筮華軸樹茂烈以顯揚其親於無
窮者不遠也銘曰維昔有儒詞宏學博教授
河汾俊穎雲集志廣才豐小試而折厥耒已人

慎修堂集 卷七
矢心靡忒訓迪遺孤皓首一德 溫綽載揚鴻
名高揭星虹麗空冰凝霜冽孤童爰興循吏時
杰父志母儀丕顯無缺維茲一門萃美作則奔
卜堂封玉埋同穴鐫銘藏幽萬禩罔斁

文林郎陝西長安縣知縣前進士漫川閻

公墓誌銘

嘉靖丁未吾晉以策士對 大廷者二十有三
人漫川閻公其一也予亦預焉公形貌魁碩直
諒坦夷望之知為鉅人君子予日從公遊心竊

愛慕之其年冬授尹長安甫數月聲實歛起部
使者交薦公車咸謂華秩可以戾契致庚戌春
上計都亭坐飛語中傷時論愕錯不能平公怡
然曰仕以明志志苟行矣雖一邑吾已足如不
可行三事九列胡為哉匹馬歸舊山不復致一
辨予每過祁必躬先造訪公食飲笑謔至窮晝
夜一切升沉得失絕口不談竊視公家徒四壁
立而意氣充然若有所得者豈非古所謂近於
道者耶甲子秋公子談衰經走數百里持司農

北厓馬公狀涕泣請予銘乃知公以是年閏二月三日捐館舍矣予驚悼不能已既為位哭乃嘆曰公志厄於時而未伸才遏於位而未竟尚意彼蒼以遐齡益公也而今乃若此是尚忍不公銘耶公諱繩芳字世武漫川者學士稱之也曾祖威仕上海稅課大使勅封文林郎永清知縣祖睿舉弘治己未進士為御史有直聲終浙江按察副使進階亞中大夫父師賢邑庠生母陳氏太谷人憲副璧女也公生有異資遲重

不戲恒若有所思念計畫然者亞中公出必令隨杖屨試以句即應口成輒有奇思翁喜曰此吾家千里駒也吾居官無厚積有孫若此飲水誠甘焉成童補邑庠增廣生學使試輒奇其文累冠諸士聲稱蔚然癸卯舉於鄉既登進士試政冬曹兢兢自持不失寸尺大司空沃焦文公深器重之長安尹父難其人持衡者雅知公乃簡以往云邑為三秦都會民力素瘠而供輸寔繁胥史因依作姦問并坐是困公至即講求利

害廢置所宜較量丁田盈縮之等具為畫一科
條俾輸直於官而簿正之謹其出納遏其侵牟
民迄今便焉稽定徭役諮詢鈎覈視聽一無所
假高下稱平富民某者夤緣重賂欲從輕則公
嘆曰此細民離散之由也可弗治耶正其辜而
重其役巨閹之弟坐大辟行當事者千金檄公
寬其獄迄不為移終南間沃壤巨室攘為已有
賦役遺於民公奪其田俾故主巨室不敢違簿
書纖細躬自校讎老吏宿奸擿發罔後請求干

澤者不敢窺長安之門新棘闈治廨舍竹頭木
屑無所遺漏一時清明嚴整之績洋溢關西乃
監司某不悅於臺臣疑公發其私百計詆誣同
事者忌公名又從而醞釀之當局之臣不加察
遂至昧昧焉歸則闢書塾於城隅聚古今圖籍
探討玩弄後生從之遊者啟發諄諄無所倦才
彥為盛邑東南多佳山水約里閭耆舊結社其
中佳辰令節終日徜徉時就故老田夫講耕鋤
卜晴雨渾無軒裳之態非其所友雖貴勢不與

接也天性篤孝事親定省有恒甘旨必親調侍
父疾衣帶不解者月餘鬚髮為改居常急人之
難息人之爭故欣欣愛慕者多焉配武氏庠生
廷璋女端嚴溫惠克相宜家生男三諮談皆縣
學生諮娶張氏典膳冲霄女繼胡氏談娶程氏
庠生天善女誥聘許氏知州鴻程女三子皆績
學有雋才造物將以是禪公耶女二長配生員
呂鉉次字范尚緒俱蚤卒孫男二嗣龍嗣夔孫
女二俱幼公所著有禮經通旨詩學體要盤谷

謬稿藏于家生以正德乙亥四月十八日葬以
卒之次年二月十七日為之銘曰 器以方毀
亦以皦傷祗繫於值豈繫窳良不緇其皦不易
其方要終考實其美彌章揭揭閭公邁往允臧
仕胡不達年胡弗長在我者立曷塞曷亡 宮
鑽石用發幽光

文林郎山東益都縣知縣前進士新齋楊

公墓誌銘

隆慶丁卯五月十六日益都知縣新齋楊公卒

于官從兄江適以視疾至遂歸櫬自青居無何
江亦卒公配李孺人以八月二十五日葬公于
七里村之原而以銘屬公公於公為道義交且
締姻好往送之青執爵郊亭胥以崇德流聲相
砥勵詎意餞別之岐遂為迎櫬所痛何如哉銘
其曷可辭公諱沐字子新新齋其別號也曾祖
林祖永寧父鍾世為予邑南里北之望族三世
皆輸粟助邊得授義民爵然醇篤朴茂布素自
如官服不時御也母淮氏公幼即穎敏絕人十

六補郡庠弟子員十八食廩為文崇理致屏浮
華累試有司無所遇嘉靖辛酉乃舉于鄉乙丑
登進士其夏授令益都邑麗郡治憲臣駐焉且
藩封戎伍錯列雜居去邑數十里即巖阻綿亘
椎埋不逞類糾聚其中擅坑冶利旁近村民亦
漸相染習官司稍繩正即呼嘯而起數千人可
立至夙號難理公殫精竭慮事為經久圖凡稱
梗者悉爬梳剔理之任憇任勞無所避甫數月
庶政秩然有章豪猾潛形胥徒屏息邑遂改觀

諸上官知其才委托皆至公悉心條畫不假力
下人日坐庭中理租賦剖訟牒決衆務事無巨
細必精審致詳而後已率夜漏下二十刻始秉
燭歸休性素畏謹遇事少留即蹙然無寧宇為
之廢寢與飧僅朞月形漸羸瘠性度或失常猶
隱忍力疾莅公事未嘗少自暇所親率以節勞
規輒曰吾方快於是不為苦也易箒前五日稽
戶則持筆定差役高下惴惴懼少乖其宜夜分
始竟事俟黎明懸示於門然疾遂不可為矣生

以嘉靖乙酉九月九日年四十三身配李氏平
陽衛參將李忠女側室譚氏王氏皆無子女一
許予子孟禰公前母張氏生太學生潤亦無子
李孺人請於淮孺人及公友西岡劉公方齋王
公立江子體乾嗣公後協於禮矣二公與楊公
友自束髮迄茲若金石云惟公以少子為父母
所鍾愛而周旋左右恒恐失父母之權父母甚
安之平居沉默靜退若不勝衣擇地而蹈擇言
而發視人之不善若將浼焉人莫不以遐福為

慎修堂集 卷之七 六
期也強年甫仕乃勞瘁殲身於國無負矣而
垂白之母養未能終弱女寡妻育莫能及可勝
悲耶然體乾已十齡志趣異凡諒能繼公後者
庶幾無恨乎乃攬涕為之銘曰 琮璧輝華薦
清廟兮登降方興胡然而缺杞梓輪囷棟明堂
兮雕斲方施胡然而折昇之奚奇戕之奚倏真
宰茫茫孰窺機軸榮悴往來乘除倚伏千古錢
顏疇永疇速勤事委身允矣良牧不朽昭乘永
賁川谷

文林郎山東高苑縣知縣金溪劉公墓誌

銘

劉公諱光啟字叔孝金溪則其耕讀地學士大
夫即以稱之也世為臨汾安仁坊人曾大父懋
隱德弗耀大父璇治毛氏詩遠有端緒邑中經
指授者多為聞人若太宰西磐張公其一也仕
陝之保安知縣後贈太常少卿子二伯和成化
丙午舉于鄉歷倅松江慶陽湖州三郡即公考
也仲穆正德丁丑進士由庶吉士給事中少卿

終焉湖州公配燕氏有丈夫子三長光裕舉嘉
靖戊子鄉科次光貽郡諸生有雋聲早卒歲甲
午公繼舉時與長兄稱二俊云公之舉與予同
時年甫踰冠明達雅馴習聞當世之務強記不
遺陳說纒纒有本末同游之士多質疑難輒得
所未聞治經承先世心傳藝術精熟復從金豐
東先生學為古文詞造益淵邃豐東以文名一
時少許可特器重公衆謂公必副金先生所期
願也乃八上南宮無所遇已未春 廷授東藩

高苑令邑瀕清河時橫決泛溢昏墊特甚四民
轉徙十六七城垣陸沉官寺隳圯俗習游惰宿
胥弄文公私玩偷誕慢庶務廢文糾紛莫可理
公至悉其狀感額若不能一朝居既而迺憤然
曰 天子挈一邑人民土地以俾予矣非予理
之而誰耶迺慨然為飭治振起圖遂築堤以捍
水侵增城以備暴客壇壝祠宇易壞為新居無
何邑治煥然改視矣上官以為能郡有艱鉅務
及均賦諸議輒屬公與諸令以賢稱者俱衆或

依違希迎當道意所向公每直前正詞奮筆就
草挺然少所遜同事者後先從史嘖嘖稱美而
中忌後言讒口四布公莫之疑也會部使者行
縣于其鄰公以諸尊貴吏同時且臨吾邑邑夙
瘠莫為備苟僦館舍假供具非禮也吾耻之即
下令益治諸可為臺廨所廚傳供張務具備姦
吏救民乘而譸張踰初令監司某業入忌者言
遂誣收印綬仍滯留歷下再踰年其視事僅七
月耳壬戌夏末予承乏入東藩次月公迺歸里

舍公敏識通才與人交誠心直道有就謀者慮
事畫策可否率當人心衆咸稱能曰他日必良
於官也而今若此是非命耶湖州公訓子有矩
度既歿而燕安人率履不渝迺三子胥底于成
然性嚴急公左右就養獨得其懽心戊戌春當
赴南省期值安人微病即侍養依依不忍違事
庶母馬氏禮敬有恒與兄光廷弟光衍相友愛
白首不衰初保安湖州之公不事家人生產雅
好圖史茅茨數楹藏書萬卷公歸自東日吟咏

其中興至則發為篇什率有古作者風坦中和外無城府機械雅善談詁高賢畢集公至輒烘然解頤性好賓客座上常滿而交際往來吊賀餞會之儀必盡力而不廢亦每急人之難坐是家益落然公不以是繫于衷訢訢如也蕩蕩如也蓋人所難者迺萬曆己卯春瘡于拇醫易之竟延潰莫可療至二月二十日卒得年六十有九以生正德辛未二月十三日所著詩文若干卷藏于家配王氏邑人例授指揮睿女端莊誠

一多助公馬側室張氏邑人壽官進臣女子男一奎郡庠生娶李氏蜀藩左相芝山李公鈞女也女三長適馬忠亦庠生次適張文林季適陽曲鎮國中尉知紛之子孫女一幼奎以公卒之年八月二十九日葬公于周家莊先塋之次持其內之兄鄉進士李君承顏狀微銘于予予自附公年誼以道義相切劘未始少逆于中四十餘年如一日是知公者莫予若也而公遽至是奚忍銘公又奚能不銘公哉銘曰維劉于邑

文獻相承保安肇基玉立淵澄別駕太常作求
繩繩迨公振藻嗣兄迭興溫夷膚敏可翼可憑
雖曰于仕邑救災仍莫知我勩莫謂我能黽勉
從事讒忌交騰唯命所適臧否奚凭責于荒野
心泰德弘位雖未顯名則可稱何以傳之銘章
是徵

七品散官澗水寇公暨孺人任氏墓誌銘
余少受學則聞榆次寇氏衣冠之美甲吾晉時
司馬公方以茂烈鴻猷羽儀朝著太守君弱冠

發解文式于四方鄉貢君亦以宿學顯名祠部
君象賢早奮飭躬莅政世德是求余習聞其盛
心嚮往之既舉進士蒙 恩入中秘得與邑人
今給舍李君為同館時與之稽前修則古今因
及鄉國之賢又聞司馬公弟散官公者舍貞履
素高蹈丘樊李君精鑒識慎與可言可信余益
嘆寇氏之多賢云今年秋李君以祠部君狀過
余曰散官公歿已久茲任孺人復亡葬有期願
子銘之按狀公諱天衢字汝亨別號澗水始祖

信元末自徐溝避亂遷榆次信生文長文長生
彥清彥清生琰是為公曾祖率隱德不仕祖玘
以子儉貴贈大理評事考功以明經判定州後
皆以司馬公貴贈封右副都御史先妣趙氏妣
吳氏皆贈淑人公性資穎敏好讀書日誦數千
言以父兄皆業儒乃謝去理家政事父母孝敬
純篤終始弗渝定州公嘗誣繫東廠寺人虐斃
薰灼公周旋左右卒以無事既歸奉就司馬公
養往來秦越服勤承志率得懽心事司馬公甚

謹言動皆則之太守鄉貢祠部三君遊學計偕
公悉督課供饋故俱以成立教子嚴甚雖小過
不姑息必令之改居常訓誨惓惓以讀書明理
孝弟立身為先見人之善欣慕若已有其不善
者必面折忠告人以其質實亦不怨也居鄉好
義崇信同鄰吉凶貧苦及落魄不振者咸為之
周給歲饑散積粟貸于鄉或沮之曰饑而貸之
弗圖償乎公笑曰能積者貴能散也矧鄉人枵
腹償與否可計耶辛丑



入掠故家皆閉糴

公出粟於市隨所有易馬復以米給守城者正
德中嘗輸粟助邊受七品散官迺嘉靖乙巳正
月二十三日以疾卒易箒精爽不亂尤諄諄以
辨義利慎離間為子婦戒距生弘治戊申十月
二日得壽五十八云配任氏同邑德之女也十
八而歸公端淑仁厚奉舅姑柔順不違舅姑安
之事散官公肅然以敬處娣姒雍然以和理閨
壺秩然以莊故內外咸稱其賢弘治己酉二月
十七日其生嘉靖己酉正月十六日其卒也享

年六十有一子男二陔國學生陵邑庠生娶皆
郭氏女二長適張儀次適李芳南陽二守君應
時子也孫男二一鶴聘刑科給事中李君敏女
一鸞聘國學生郭君廷健女女四俱幼陔等以
十二月初七日合葬于城西祖塋之次銘曰
剛直質朴古稱近仁孝友施政書美君陳於戲
寇公依稀與鄰高門濟美用式其人

山東冠縣學訓導任公暨配樊張賈訾四
孺人合葬墓誌銘

余少時則聞父老言故司訓任公之敦學飭躬也心甚景慕之既迺與公孫今比部主事君遊比部夙雋拔明爽學裕行修余益信公詒範之遠云嘉靖壬子七月四日公繼配訾孺人卒于家比部杖淚謂予曰先大父握瑾懷瑜小試即已卒于正德辛巳十月二十七日已祔葬趙村先塋然域中石未備也茲大母將合窆於祖之藏子其與之銘按狀公諱紀字廷振世為河東太平人高祖某元季避亂入郡城天朝平

定遂籍臨汾曾祖守中祖方父本率世德力農妣李氏公資材超穎丰儀修偉蚤失怙刻志勵學丘索子集強記博識為文不事沿襲而奇邃清約華實彬蔚總卅入郡膠踰年得廩聲稱甚籍傑士魁儒折行下之會上省闈郡守胡公睿祖于郊特舉酌屬公曰子學行茂彰大魁決矣時衆望率然而公數奇屢試無所遇成化壬寅例副貢試首貢陰祈公遜忻然以疾辭乙巳貢上南宮遂遊成均既而曰丈夫不能樹績當時

恒修堂集 卷之七 十四
得嘉惠後學足矣復出就銓冠縣訓導至則植
矩範嚴條則先德器端文體而又警覺怠荒陶
鎔頗辟諸生悉洋洋然化也鄰封之士胥悅景
從公啟迪淬磨率無少怠弘治甲寅偶微疾喟
然曰夫仕所以求見諸行也吾教其庶幾矣不
去奚為遂投狀解任諸士涕泣願留而公不可
止矣歸則祠先修祀睦族訓子日惟左右圖書
暇則誦古文詞或陶然獨酌雖親舊不苟從其
不善者輒引避之有司鄉飲禮為大賓一與弗

再往或問之曰 朝家鉅典寔以優老尚賢也
所司苟率峻情吾恥焉奚往為動靜安和為一
邑大老者三十年可謂罕見其儔矣生以正統
辛酉六月九日壽八十有一配樊氏天順辛巳
四月十五日卒繼張氏天順乙酉十月五日卒
繼賈氏生子一璉早卒女一適照磨張紀成化
庚子二月十七日賈卒乃繼訾孺人孺人邑著
姓 女植性端莊夙閑禮訓及笄歸任公躬親
辟絰閨壺肅雍偕公之成均復之冠公厲廉潔

以帥士孺人甘苦節相于中故得無撓焉公歿
孺人總家政督子婦以儉勤業遂漸殷凡祀享
燕賓必身致誠潔雖老弗怠族里姻鄙稱罔間
言享年八十有五生子五政壽官娶郭氏攷娶
張氏皆卒敏比部父也娶范氏枚娶陳氏汶娶
武氏女二適處士劉宗寶平陽衛指揮馮大臣
孫男九民望即比部舉庚戌進士高等授今官
娶安民順西河王府引禮娶程繼杜民敬娶金
同早卒民欽民悅娶張民信民孚娶荀民範民

懷敬孚悅俱郡學生女二楊尚忠張九臯壻也
曾孫男二女三俱幼孺人生以成化戊子十二
月九日樊生正統甲子八月三日張生正統丁
卯七月六日賈則景泰甲戌三月十二日生合
葬在癸丑二月十九日銘曰 任以國氏世著
河東郡城避地克振自公膠庠初試桃李寔繁
厥躬少晉慶衍後昆有美元孫虬騰鳳翔維公
德馨奕奕煌煌鬱彼堂封四配同穴勒銘幽宮
昭揭賢哲

徵仕郎彭城衛經歷龍田周公墓誌銘

龍田周公者臨汾人也名照字德溥系出漢絳

侯勃勃封河東子孫遂散處近邑 國朝永樂

初諱麟者以詩經發解于鄉是為公從曾祖也

大父庸父宗彝號實庵皆隱德不耀配張氏正

德己巳八月一日生公幼即敏慧謹畏未嘗與

里中兒嬉戲時實菴翁春秋高鍾愛特甚遣從

良師遊年十六試于學使周公周公大奇之錄

入邑庠冠諸生公愈自奮勵誦習顛勤實菴翁

慮其勞或過乃從例入太學公以太學多奇士

朋來聚樂麗澤資深四方奇士輒推遜公莫或

先然念實菴翁不置竟謁告歸左右就養誠敬

懇至翁日融融然安其養也與二兄分異退讓

若懦夫親鄙或以為言公曰孳孳貨賄之盈虛

得無傷兄心乎每大比所司廉公文藝輒勸令

就試視學憲臣若章公劉公廖公率稱賞獎予

列置異等咸以高第若持券取也屢應鄉闈無

所遇公怡然曰吾豈可力與命競哉乃以所業

授諸子閉門訓迪絕意榮名諸子爭自濯磨蔚
為時彥始就試銓曹授霑化邑丞時邑逋租積
鉅萬計公顰蹙曰吾不能奮學術以福蒸黎又
安能事鞭笞以毒貧病耶遂疏致其事而歸既
得勝於樊河之上結茅種樹左右圖書日與有
隱德者三四公游歌觴飲瀟然出塵之趣非其
人莫得而預也丁卯秋離石烽火達於河
汾時東郭城卑陋不足為守公毅然率諸同志
畫修築圖首捐重貲為物先日躬臨督視之城

成屹然若金湯中丞楊公上公高行于朝詔
進今秩以示褒垂銀振鷺人以為華然公罕御
也鄉飲大會延為上賓一赴不再往其恬素類
如此公資穎志專力勤學博所治不直舉子文
凡他經子史及前代名人著作悉務記覽發為
文詞清逸典則沛然不可禦作字端謹遒勁類
其人生平飭躬靜嘿多能而不炫與物坦夷有
犯而不校溫恭樂易而言動無少詭隨藻鑑精
明而終身耻言人過宅心誠而正慮事遠而詳

容衆而親賢厚人而約已接之若春風之襲人
也治家有則門庭之內肅然秩然豐而不華儉
而不嗇視日來里俗侈肆盛麗之觀若將浼然
至寒者與衣饑者與粟病者與藥死者與棺蓋
不可勝計率為之若恐後未始少滯留也族姻
以空乏聞或無依以立必隨親疎而時給助雖
久不廢里閭稱貸亦無峻拒後其人莫能償遂
折券不復問族人有寓異省者歲時遣人走其
家問遺之而又修族譜以明昭穆置祀產以時

薦享凡所以聯屬撫恤以承祖考者心力罔不
盡然皆不欲人知也余辱公道義之雅四十年
矣按間林樾時得從公於山水之間見公德淳
而行謹氣粹而神清恒以公期頤可必也公夙
善星命不謂予言為然迺萬曆癸酉二月二十
五日竟以脾疾終得年六十五耳終之日市童
走卒莫不齎咨哀悼傷善士之云亡公配王氏
卒繼陳氏侯氏子男四尹東娶王氏為東娶
亢氏皆郡廩生興東太學生娶張氏啟東郡庠

生娶寇氏繼李氏女一適庠生亢思敬孫男十
二繼元繼謨繼烈皆郡庠生繼史繼獻繼哲繼
采繼常繼旦繼奭繼芮繼任皆未冠然治經飭
行類不忝公所貽孫女四其聘字皆名家尹東
等以其年七月七日葬公于九州堡之新阡以
葵溪張公狀徵銘于余公行宜銘也乃銘曰
在昔賓賢自鄉考德入長出治勲猷允塞科目
制崇士修藝業學博詞宏高華輝
今古任人
途惟茲二周公兼之乃不一試政施于家曰惟

孝友化洽于鄉寧事臧否義問昭宣顛連允殖
仁讓教成里閭惟則勿謂退勇高風洋洋勿謂
身隱德音孔揚克開厥後如珪如璋行楨王國
為龍為光
皇恩有赫賁于幽堂山蒼蒼而原
膺膺是曰哲人之藏

迪功郎山東長清縣二尹原溪亢公墓誌
銘

亢公諱得霖字伯雨原溪其別號也世為吾臨
汾人亢之裔環邑遠近而居者其麗詎直數千

指哉散處吾郡及太原諸邑者未悉也相傳自汾西徙然斷碑遺碣則石晉時姓已著於郡顧土風椎魯且兵革屢經迄元末地大變譜牒莫可稽云天朝平定版籍鼎新則繫公先世於東陽廂予先世於橋東里然諸先公即契誼親密不啻近屬然者迄今未聞也公曾大父復威大父貴父玘皆隱於農賈母許氏以弘治壬戌八月十六日生公性識朗茂志趣高特自其髫齒時即自力於學稍長為文輒奇崛出人鄉先

達東汾康公雅器重之嘉靖壬午試於有司學使蒲陽周公奇其文裒然置選首錄為弟子員迺公父以獨子不欲勞於學遂以例入辟雍公向往愈勵日與海內英流考德講藝上下其言論胥麗澤焉居無何父以賈齏卒於維揚公浮河往奔號痛幾殆奉櫬歸葬甫襄事母即邁貞疾公檢方延醫進湯藥時食飲視顏色承志意周旋左右奉養百方者十餘年又獨持門戶自是學少息歲乙卯謁選人都亭時予守官史局

別久而聚甚驩也公入試銓曹文在高等得齊
之長清丞邑當入齊午衢且有勝區登岱使輶
必憇息焉公佐令經畫廚傳賓寮各有恒度大
吏胥至無滯節無濫費交口賢之嘗解俵種馬
徵收常賦又司香稅於岱頂尤人易以動者公
兢兢自勵悉一無所染一時丞邑咸遜服焉於
是中丞劉公傅公各移檄禮公有不索常例克
守官箴之褒皆錄實也會令虛位者再年監司
熟公賢篆又屬公愈精心求平有移訊牘者必

從容質究期得其真仍為傅輕獄贖金訟穀織
細必入於公帑尊禮仁賢敷求治理咨軫民瘼
務在休息而安全之踰三載公忽歎曰仕途之
味予既已知之矣吾有子可教有田可耕胡不
歸胡不歸遂投牒以謝事請諸監司惜而留之
莫能得去邑餘二十年邑人懷思未已焉歸則
闢精舍於居南羣諸子及孫躬禮明師共督課
之伊吾之聲時徹昏旦諸子及孫各震用濯磨
經業精雅每師儒品士一門羣彥遞相甲乙為

多士先公督之愈益勤暇則倡諸耆舊為朋壽
之會探奇討勝雅歌徜徉樂陶陶忘倦里鄙望
而慕焉素強健寡疾病人咸以期頤可必也迺
萬曆庚辰二月十三日以疾卒得年七十九云
公長身玉立樂易真誠豁達無城府鄉鄰爭辨
多就質平斷詞正容罕所回互其否者亦素熟
公衷無忤也郡延為鄉飲賓再赴輒遜謝篤厚
人倫待宗族內外姻恩意周洽諸婚嫁喪葬及
夫里庸調一切身任之凡環公而有連者視公

若外藏母有遺言以姊妹為託公處之禮愛尤
篤推及諸甥或給以質遷或成其名祿屢費重
貲不計也配張氏先卒繼衛氏馬氏馬氏亦先
卒子男六時中府庠生娶寇氏武陟縣尹鸞女
審中娶范氏貢生金女先卒宜中府增生娶王
氏鴻臚序班延桂女繼王氏儀賓志淳女繼李
氏邑人梅女用中府廩生娶王氏臨潼二尹世
臣女致中娶荀氏廣元三尹景哲女應中府廩
生娶李氏太學生光溥女繼田氏儀賓大亨女

女六一適庠生張詢一適庠生周為東一適張
南正一適庠生劉守恩一適庠生宋潤一適宋
洛孫男四有溱邑增生娶張氏有洧娶張氏有
淑娶張氏有澄聘張氏孫女九曾孫女二諸子
元孫皆有聲場屋巍科可刻期至者而公不待
矣惜夫時中等卜以是年閏四月二十二日葬
公于孟家莊之新阡乃手所述事狀造予以銘
請曰茲先君治命也願先生終惠焉公忘年友
予以道義胥砥礪四十餘年未始少解于心也

公瘡于足僅數日以病篤聞予亟趨往視悲不
能勝公張拱禮予語諄諄多不能辨矣哀感迄
茲莫能已是奚忍銘公然生平交誼又奚能不
銘公哉銘曰明慎以行其志於邑兮上下稱
賢政成而乞其身於未老兮明哲疇先義方以
式穀子若孫兮探討遺編芝蘭競茂於庭階兮
濟濟綿綿裕而好行其德兮義問昭宣良朋結
社以嬉遊兮樂我高年箕範衍福惟五兮公允
矣其克全勒銘賁於幽宮兮千萬世以永傳

散官西麓盧公墓誌銘

嘉靖戊申二月二十八日西麓盧公卒于家冢
子國學生應祥馳介如都亭以告且徵銘予走
位哭遂抱悲痛踰旬日情弗忍銘公然義不可
以已也乃序而銘之公諱登字伯升為太平西
侯之世族曾祖仕昇祖恭義父孜率有隱德而
不顯母曹氏公少即精敏無不通達長而愈騫
奮既遊膠序遂入太學汎交海內名流意氣招
來率依依不忍舍以親老歸奉色服勞親心大

悅間課家政躬穡事不數年田畜所入數十倍
於前闢書塾延儒碩以訓子弟及里之茂異仍
躬督勸之絃誦之風洋洋如也因而成材者甚
衆侗儻好義鄉黨吉凶貧苦不能舉者落魄不
振者公率為之周給仍經紀其始終藉公而濟
感之終身者踰數十人敦崇禮讓慎重倫理於
忿爭者則抑之健訟者則諭而止之於不若於
倫者則化而導之俗因以勸且有智度識大體
衆有爭辨不能決輒就公平紛紜轆轤以片辭

折之刃迎縷解排難息爭未易悉舉嘗自言曰
使我得時從政必有可觀噫惜哉三晉荐饑公
輒發粟以賑鄉之貧乏又貸以麥種既熟亦不
責其償素善予邑舉子楊世禎屢周而貸之禎
豪士貧甚病且死以二子托公公焚其貸券挈
二孤以歸軫其寒饑而衣食之隆之師儒以訓
迪之不啻己子若也二子學既成其族人欲之
即以歸焉無難色遠邇義其事白於郡郡守王
公溱表其閭曰尚義云公從兄鑑子婦翁也生
子輒不育公以從子良可以成屢薦于公俾以
為嗣仍勉之學予之締姻亦公意也公中誠外
質不事矯飾性復伉直不為脂韋突梯之態義
有不可輒形於外遂忤當道者意讎家乘之巧
誣以他事當道曲煨成獄欲坐重典父老數十
人上書為公頌冤當道雖愧悟竟坐除名然其
事無幾微涉本末具見行路心惻當道者既去
衆謂公可以自白公喟然曰已焉哉命吾已知
之矣縱能雪吾冤吾又能出而干時耶遂不辯

復輸粟賑荒得授散官遜志丘樊不求榮利佳
辰令節則與客登臨吊古以發憤懣陶陶然與
世相忘晚苦痰喘應祥等求醫致禱遂以愈嘗
使應祥仕對曰祥不能違吾親也公感之遂不
強今春疾復作竟不起距生弘治戊戌五月十
日壽七十一配關氏貞靜端明閨門雍穆與公
終始如賓以祀事之繁也為公置側室翟氏以
居先公十六年卒公竟不再娶子男五長即應
祥次應瑞散官應聘應期應選聘選皆早卒女

一適鄉寧縣學生王喬齡孫男六向陽向德向
明向奎向上向極女一適生員郭九齡子應祥
等將以十二月某日葬公于某之原公天性至
孝平生事父母無惰容居喪踰禮歲時展墓率
泫然流涕愛賢好士老而彌篤予初試于有司
邂逅公於逆旅公即愛重予既處甥館公撫愛
備至恒以古人事業為予期予登第公喜甚走
書為賀予方擬躬持杖屨以侍公歡暉勉樹立
以酬公知而公遽已矣痛何如哉痛何如哉哀

而為之銘曰 行方以端氣和而安維質之良
濟人傾已尚賢無弛乃德之常求全致毀遘彼
兇完直道之傷順受不校 嗣維肖千禩之光

慎修堂集卷之十七

